

Hic complures Naves Cinnamomo, Elephantibus ac Gemmis varijs onerantur. In hac Porrugallenses Arcem *Portus.* habent Rege permittente a se exstructam. Portus est amplus & tutus. Habet præterea sex Portus præcipuos, *Montes.* præter alios minus celebres. Insula valde montosa est, visiturque Mons sublimis altissimo Situ inter totius Indiæ cacumina. Incolis *Pico de Adam* dicitur. Credunt enim Indi firmiter isthic Paradisum fuisse, & Adamum ibidem a Deo creatum, dicuntque etiamnum hodie exstare primi Parentis pedum impressa vestigia, longitudine duos palmos excedentia. Scribit ex relatu cujusdam Mercatoris Mahumetani Ludovicus Romanus Patritius, in fastigio huius montis specum esse quemdam, quo se recipiebant ejus Regionis omnes Incolæ in primi Parentis sanctissimi memoriam: memorare enim Incolas Adamum post lapsum illic fletu & continentia: poenitudine ductum culpam redemisse. Refert idem auctor esse alium Montem, vastissimæ longitudinis, ad cujus radices Pyropij reperiuntur, qui vulgo Rubini dicuntur. Cinnamomum hic nascitur præstantissimum tanta copia, ut Silvas ac Nemora hac Arbore refertas habeant. Incolæ Maritimi Mahumetani magna ex parte sunt: mediterranei Gentiles (*Cingalas* vocant) color illis albus, statura procera, abdomen prominens: ventrem enim curant. Imbelles sunt, exigui spiritus, & ad bellum inepti. Tormentis scribit idem Ludovicus, non utuntur bellicis, nec ferro: sed eorum arma arundines sunt: ob id perraro in prælio occumbunt. Sunt autem ingeniosissimi, & ex Auro, Argento, Ferro, Ebore, opera faciunt politissima. Bombardarum sive Scloporum Fistulas insigni arte nunc formant, velut artificij manu exasciatas. Narrat sæpius jam nobis memoratus Linscotanus Archiepiscopo Crucis imaginem oblatam, quam Artifex Ceilanus ex Ebore confecerat, longitudine unius ulnæ, tanto artificio, ut capilli, barba, & ipsa facies viventis hominis gestum mentirentur, optima staturæ mensura, In Europa nihil tale. Quare ab Archiepiscopo arcæ inculsa ad Hispaniæ Regem missa fuit, digna æstimatione inter preciosissima tanti Regis *Cimelia.* In Histrionum artibus excellunt iidem maxime, multasque venustates corpore ac ludis exercent, totam Indiam percurrentes, magna spectantium admiratione. Victus eorum ex *Victus.* Lacte, Butyro, Caseo, ac Oriza est: potum ex Palmarum succo colligunt. Vestis infra umbilicum è Serico aut *Vestium.* Gossipio. Superiora enim non regunt. Nisi quod caput panno subtili contegunt. Aures Auro ac Gemmis ornant: Zonas gerunt aureas gemmis ornatas. Ipsa Insula commercijs valde ob Portuum frequentiam ac rerum affluentiam opportuna est.

Atque hæc de Insula *Ceylon* deque tertia Orbis parte *Asia* sufficient; ad quartam & postremam Orbis Terrarum partem longe maximam *Americam*, quam Isthmus nobilissimus, & Septentrionalem facit & Meridionalem, pergimus.